



正米史中卷合

懋和輯前計輯兩

和丁壹百死計五前計兩

甄麗瑤土壹百死計五前計兩

有麗瑤土壹百死計五前計兩

白死壹十死百五前計兩

共甲

張燕公集卷六

唐

張


說

撰

頌

聖德頌

太古厥初遺文闕矣書祖二典聿陳五教唐虞之訓歷
 代宗焉孰同理而不休奚同亂而克趨皇唐之興也道
 積四聖時將百年澤浸生人自根流葉孝和晏壽嗣子
 幼冲凶臣嬖如蹙弱王室人甚崩角之危朝深綴旒之
 歎賴天獎忠勇大戮鯨鯢尊文廟而安神清帝宮而待



聖少主奉天命以至禪皇上拒天命以固違羣公卿士
胥進曰陛下孝弟之至歷數在躬處儲闈有讓元子之
德居藩邸有辭太弟之高六合欣戴三靈允協爲天下
君其誰與讓皇帝義不得已曰吁所憂之長也乃被帝
服陟元后延羣臣見兆人是日也景雲至茲歲也戎狄
來其尤祥極瑞雜沓異類蓋翫狎而不記矣上方謹庶
務覽衆則履乾乾懷翼翼遊道德之靈圖從鸞鷲之珍
羣視天下之所不見聽天下之所不聞帝與皇綱於斯
備矣宜定效報之禮革封禪之則答神貺揚元德不然

者則二宗無類帝之壇五岳無省方之官矣若夫湯頌
傳於考父大什著於周公臣下之志不可闕也敢作頌
曰

天祚聖唐啓我明主大哉皇帝與天同矩天平蓋之地
乎載之陽和化育懷生賴之孝乎惟孝告成於天靈壇
神岳思皇嘏焉皇哉皇哉胡可捨旃大君受命景雲來
翔流天汎日爛漫成章稽諸瑞典昔祚軒皇而今表聖
土德以昌西戎遠國畏君之靈古稱卽序今乃來庭帝
女是降其從如星天人偃革以迄太寧邊兵徂獷狃於

征伐帝初歷試護彼窮髮懷哉好音稽顙天闕遐哉大同天子之功

上黨舊宮述聖頌

維開元十有一祀正月皇帝展儀於河東挾右太行留宴上黨整兵耀武入於太原設都建頌以崇王業南轅汾睢祈穀后土天清日潤神歆如荅三月庚午飲至長安六軍解嚴四方和會邇觀法象遐咏德澤大虞巡之典修美漢祠之禮舉人心翕而一變神物效而無方於是邠王臣守禮寧王臣憲申王臣範薛王臣業獻書於

內開府儀同三司臣憬尚書臣峻臣象先臣頌御史大夫臣灌抗疏於外僉曰陛下受天歷數稽聖典謨道貫三靈仁育萬類掃陰沴而覩日開闢之功也尊文考而御天帝王之孝也天以陛下爲子人奉陛下爲君萬殊之福祈應畢臻三代之風頌聲咸作今潞人懷代邸詠泗亭採聖崖延立石將表潛龍之館勒啓聖之圖勤亦至矣陛下推而不報其何以下塞衆望上對神休哉臣聞天之所啓人之所戴必憑睿聖元懿之德元命眞符之紀功業見乎變德施加乎時德厚者施溥功元者應

速或階晦以彰或由難而昌蓋生其德之謂天授其時之謂命天有成命其可沒乎陛下昔居是州也紫雲在天神光照宰白鹿來擾黃龍上昇隴出仙洞而神魚躍山開禪穴而靈鐘韻謠言合讖巨迹引途嘉李傍連神著自起當此時也金石預變獄頌先歸政殷六府八重五教陶無罅器漁有讓泉神而化之仁不知力昔龍負圖而大舜登狼銜鉤而斥殷昌元圭錫於夏禹赤伏歸於漢光猶言先運吐符希代稱寶未有窮祥極瑞俶儻環異如今之至者矣若元貺集而不彰則神心不愧鴻

業成而不贊則祝告無聞是掩天休而蓋聖德也臣子之罪將何解焉願聽潞人以揚丕烈帝曰往者中宗違代國步維艱天祚我唐大命集于睿宗大聖真皇帝朕畏天將命不敢怠遑其乾符坤珍皆先聖之餘福朕何力之有焉然重違昆弟公卿之請抑以敬從無爲虛美重朕不德也羣臣遊聖蕩莫能名約乎舊史敢頌成績曰

帝德廣運乃聖乃神天祚聖兮唐雖舊邦其命惟新再受命兮帝初正人降居上黨天下往兮黃龍晝見攀天

而上九五象兮帝適於野紫雲之下求必在兮帝寢於
堂變龍有光觀者駭兮天跡星謠木連著立摠神異兮
靈鍾化穴縞鹿赤魚可詭異兮上天無聲託類附形覺
悟人兮聖皇齋栗在得戒失昭事神兮皤皤潞老樂我
王道愛舊宮兮赫赫頌功與天比崇據無窮兮

在潞州祥瑞頌十九首奉勅撰

日抱戴

皇帝初臨潞州景龍元年四月二十有七日其日日抱
戴頌曰

日告帝符王起乘土重光五色四方之主或抱或戴氣
華聊嫵大明經天豈忘忠輔

月重輪

皇帝臨潞州景龍元年七月十有四日夜月重輪頌曰
維帝潛德受天眷命月之重輪示我金鏡璧彩內澈環
規外映君心用明神道協慶

赤龍

皇帝臨潞州景龍二年四月二十有五日晚事據按假
寐百姓白鶴觀道士宋大辯等三十餘人同見赤龍在

案頌曰

聖寐無體神融氣渙蜿然赤龍垂首據按昔有王媪預
覩興漢今此潞人亦兆靈觀

逐鹿

皇帝景龍二年二月二十有八日巡屬縣至潞河有鹿
奔走渡河水深三丈帝馳鞭逐鹿水不及馬鞭應時獲
鹿司戶叅軍崔弼隨帝而涉纔入數步馬溺焉頌曰
王者之畋必有天佐逐鹿深水乘躍而過不失其馳舍
矢如破後騎沒溺乃驗靈跡

嘉禾

皇帝臨潞州景龍二年八月二十有五日長子縣界內
有嘉禾合穗頌曰

靈氣滋液嘉禾族生或分九穗有合雙莖昔効唐叔歸
功太平今於歷試抽此德萌

黃龍

皇帝臨潞州景龍二年九月五日黃龍見於州城東五
里伏牛山南崗遲留久之觀者如堵頌曰
黃龍土精五方之長在田而見文明厥象軒圖瑞來夏

賈妖往。惟德可應。恃神難調。

羊頭山北童謠

皇帝臨潞州。景龍二年九月已後。嘗有童謠云。羊頭山北作朝堂。其州南六十里有羊頭山。頌曰。熒惑降精。是爲天使。會合齟齬。謳謠街市。通賢妙識。採斷來事。山北朝堂。此名天位。

仙洞

皇帝臨潞州。襄垣縣北有仙洞。忽然自開。十數里。仙乳。靈液凝膏。注玉頌曰。

憑乘山穴。應吳建號。襄垣洞開。神亦我報。玉膏滴瀝。石巷幽奧。天將祐之。陰靈啓道。

大王山壘

上黨記。禹治水而登此山。因名焉。魏書云。望氣者言其山有天子氣。故太武壘石爲三封。欲以厭之。頌曰。昔望茲山。當出天子。太武心忌。歷以軍壘。地氣雖廢。河清有俟。三百餘年。聖人方起。

疑山鑿斷

上黨記。後魏太和末。孝文帝自代。幸洛。見此山有伏龍。

疑而不進遂斷山東麓以厭之其斷處猶存因名疑山
頌曰

王命必有厭勝多無不徵緣錯處役丹徒舊山伏氣今
聖靈符魏雖穿鑿能違天乎

赤鯉

皇帝景龍三年三月巡屬縣至襄垣南漳水上有赤鯉
魚騰躍頌曰

龍或魚服鯉同國姓躍泉將飛告我天命鱗昭武德翼
贊興慶昔去隨仙今我迓聖

黃龍再見

皇帝臨潞州景龍三年六月十五日黃龍再見於伏牛

山頌曰

蜿蜿黃龍既見將躍氣動雲繞精流電爍文明剛健嫵
媚纖弱萬物視焉聖人其作

紫雲

皇帝臨潞州景龍三年九月九日與羣臣壺口山界坐
其時東北有紫雲翩翩而來光彩照日明日上黨縣丞
王敬賓等白刺史劉懷一并啓皇帝請上狀奉教不許

頌曰

天臨壺口露座山肩紫雲來覆如蓋如帷畢景不滅含
風自持一人有慶兆民賴之

李樹

皇帝臨潞州延唐寺有李樹連理皇帝親自驗見之御
書額焉頌曰

李興帝族寺勝延唐異枝同幹雙名合祥花轉璠蓂子
綴珠光本支百代永永蕃昌

神著

皇帝臨潞州景龍三年九月十有五日出召百姓韓擬禮
著筮卦未成而一著翹立擬禮曰此天人之瑞洎帝踐
阼授擬禮遊擊將軍長上折衝頌曰

纖纖靈著下有伏龜天生神物以決狐疑一著特起自
天立之無卦之卦告帝之期

金橋

金橋在路南二里常有童謠云聖人執節度金橋皇帝
景龍三年十月二十有五日出此橋朝京師頌曰
出郡二里橫路金橋聖人南度駟馬西朝運及誅昌時

當換堯却尋後事一合童謠

紫氣

皇帝臨潞州景龍三年十月二十有五日常還京後州內所居寢堂有紫氣七日不散頌曰

王往京國傾城戀惋紫氣浮宮七日不散斐曹隱戶輪困臺觀都人係心瞻仰雲漢

大人跡

皇帝從臨潞州還京後其宅內及州街並有大人跡長二尺五寸自東而西布武相繼頌曰

百神從王一舉西適衆觀空解連步雲迹躡似郊媒痕同雷澤曠古奇事存乎帝籍

神人傳慶

皇帝唐隆元年六月二十日夜除妖孽後其明日州佐吏索崇嗣於州南門外聞空中有人云臨淄王誅韋氏相王得天下其崇嗣告長史裴思裴思以妖惑罪之禁錮累日逢其月二十一日赦到獲免案牘猶存頌曰
天帝下席承韋於命王赫斯興撥亂反正擊凶尊主一麾大定神人相歡胖蠻傳慶

開元正歷握乾符頌

客有嘲臣曰聖主正新歷握乾符百寮賡歌以美時六合鼓舞以頌德先生獨宴默書閣含翰詞林奚其爲僿儼也臣應之曰斗水不能評巨壑之量隙光未足議大明之體何者見褊而守隘也握乾符者不謂執天命與執天命者非夫廣德休歷交相表裏況命者夫子之所罕言也焉可偏贊而總握符之盛哉如作者略大本舉小節不亦仲尼之門所聽營也是以洞思乾慮久難其述客無異焉客曰請終餘論粵若我大唐慶始白雲道

昇紫氣屬漢東失馭淮南不返高祖舉晉陽之甲戡定關西太宗因倭后之師削平天下高宗收圖海外檢玉封中九域黎人重代飲澤雖鳴鸞改號神龍中興周鼎歸唐元圭祀夏中宗違代嬖孽窺國於是乎聖上起蕃邸入鈎陳一麾水心羣凶泥首崇復大聖越踐少陽受禪當宁而光大前烈垂統拜壁而慎寧後嗣四海有覆孟之安百代無委裘之隙是之謂聖人握符之大寶也四星入輔五將出禦倚禮樂爲國計仗仁義爲軍勢英賢集殿而文教成干戚舞階而武功振敬讓光于九族

張氏公集 卷六
孝慈行於萬宇積嶂西南渤海東北織皮火毳暘炎山
汚熱海向風來王黑貂駿駿浮天溟絕冰漠連歲獻款
鳥獸無猜人之意草木無不達之氣升中於天比天同
貴是之謂聖人握符之大政也歷試上黨黃龍飛天入
清中禁白虹指日瘞汾雕寶鼎見柴岱宗卿雲蔚非應
事而呈瑞者雖多狎而不紀矣是之謂聖人握符之大
祥也以數推氣以氣定朔以星殷時以閏成歲考星閏
而革疏度置歲差而辨誤日立大衍之紀參大渾之晷
合鍾律之聲極鬼神之情是之謂聖人握符之大歷也

若夫仁聖根於內菁華發於外祥兆祕於前謠讖灼於
後自然之理也彼洛下閎者漢太初時一巧歷耳云後
八百歲當差一日有聖人正之斯人也抑將露才揚術
預證來聖有耆舊之傳記無史策之明文然至隋之開
皇及麟德聖歷三家創法一引爲徵約之年代則鄰近
稽之圖籙則曖昧未有如新歷之昭昭者矣在昔唐虞
之際以斗精受命者七人得四均間氣而生者又二十
八人所謂三十五際者也禹以金德王故夏后之有天
下也生數四百年契以水德王故殷人之有天下也成

張燕公集 卷六
數六百年稷以木德王故周人之有天下也成數八百
年伯益之命中天而堯族以火德乘之故漢室之有天
下也生數再及二百年其間距王而興不能復大禹九
州之迹及勝殘百年之命者皆五神之餘氣也咎繇降
德皇唐復興土精應王厚德載物生數五百成數千年
命厯有歸此其大較修德增祚與天無窮轉算之徒莫
能究也緯以八元三百四歲爲德運七百六十歲爲代
軌千五百二十歲爲天地出符四千五百六十歲爲七
精返初天人相應合若符節自堯典命羲和脩重黎之

舊理顛頊之厯上元甲子千五百餘歲得孔聖而春秋
之歷序暨開元十二年甲子凡三千四十歲遇聖上而
大衍之厯興是時也土德入生數之元天命當出符之
會信矣伏惟聖上聰明文思道德之具也豁達大度皇
帝之體也藝總六經漢光之學也文通三變魏祖之才
也緣情定制五禮之本也洞音度曲六樂之宗也神于
弧矢黃軒之威也聖於翰墨蒼頡之妙也兄弟善友王
季之心也子孫衆多周文之福也大寶以定天位大政
以布廣德大祥以合靈符大厯以啟成命德位兼才臨

照如此符命介福粲章如彼所謂廣德休歷交相表裏
之效也善歷者必推來運以自神興王者不俟往言以
表聖設徵夫洛下閎之語也其不有容成之事乎且如
恃有命比於日孰是夏王之福也賴卜年衰其德豈謂
周公之訓也故曰王者執天命在於俟天符致天符在
於順天德布天德在於保天位四者備矣然後陳其盛
德告於神明捨此道也胡可語正天歷握乾符哉謏臣
懵學謝生元造樂虞典之歌舜羨周詩之美文敢不敦
信辭薦清樂厭止客之誚託衆篇之後云爾

維皇六葉於赫啟聖步玉斗握金鏡地維續天柱正山
川授方雷雨施令清廟九禘堯門百慶郊稷尊祖擇昌
定命德自我流藝從我脩龜易八卦龍書九疇文舍玉
律字吐金鈎鳴絲鶴舞調箭猿愁集賢勝殿花萼名樓
神用外表事行先兆萬日朝徹千心暗曉卿雲爛熳黃
龍窈窕遊姑射神人窅登太山天下小飛祥定瑞均靈
躋類鞮譯窮天探維盡地爍此金戟鑄爲農器匪直也
然探元索秘軸止輪運辰居星轉得一神凝吹萬情辨
發斂潛合晦明幽闡階冀朝開宮槐夜卷正我長歷同

符大衍天地清焉日月貞焉四時行焉萬物生焉窮神
知化美功成焉金版玉牒遠頌聲焉

起義堂頌

堯以天下禪舜舜以天下禪禹禹將宅百揆摠萬國一
讓於稷尙再讓於皋繇稷尙先舉彼商與周以之更盛
皐繇後天我國家于茲受命非舜以考天而疇咨審靈
命之陰騭非禹以享天而德讓知厯數之有歸及乎元
元間出光大前慶垂道德而統運依清虛而立法天祚
我李厥惟舊哉并州起義堂者皇天造帝之初高祖誓

衆之地也隋氏失御國亂無家小道自賢大才胥忌惟
宮室陂池之好惟沉湎暴慢是保上帝不歆黎人咸戚
六車踰海而東敗萬乘過江而南覆豺狼入邑獍豺爭
人黔首囂然方將無訴我高祖感之乃龍躍晉水鳳翔
太原百神前驅萬姓來奔開咸陽入天門用湯武之兵
靜新室之亂遵唐虞之典承太王之基率百官受終于
文祖輯五玉班瑞于諸侯類圓禋方之禮封功爵德之
議允約法惟簡代虐以寬子惠困窮懷柔蠻貊金石一
變日月重華近古以來未有革命易姓若此之盛者也

非天私我有唐惟天祐于積德非唐求于人庶惟人懷于累仁當此之時太宗內啟聖謀外行專斷躬擐甲胄跋履山川駕英雄而爲奧主一區域而定大業周詩曰昊天有成命二后受之信今之謂也若夫脩德以降命奉命以造邦原濬者流長根深者葉茂天人報應豈相遠哉觀周之興始於后稷公劉承以太王王季皆勤儉忠厚克廣前烈至于文王成之武王啟之康王安之故卜世三十卜年八百天所命也我唐之興也始於皋繇元元承以景皇元帝皆立言邁德垂裕後昆至于高祖

受之太宗有之高宗守之中宗復舊業睿宗新景福比之周室我何謝焉且如陳德明刑庶其躬稼之績元宗道要小其避狄之仁化流率土狹其江漢之域義寧大朝羞其牧野之戰故武德中太行出大聲曰唐興理萬年蓋天之所命年代未可涯也仲尼曰惟天爲大惟堯則之又曰韶盡美矣又盡善也非至德其孰能如此其大者乎於戲先后捨元子而立子主鬯煩大位而付予天下自高祖創業百有六戰欽承丕緒十有四載東西南北無思不服山川鬼神亦莫不寧實惟藝祖儲福之

所致豈予幼孫非德之所及方將運心于元妙之境厲
志於造化之爐發令爲祥符施惠爲霖雨任賢爲兩曜
仗能爲四時俾天之下有形者遂全懷生者自足樹鋪
野繭田種嘉穀斲雕爲樸捐珠棄玉追大庭而齊風夢
華胥而同俗非曰能爾願宗祏而效焉癸亥之歲獻春
正月濟河橫汾省方展義存問黎老緬慕本邦城郭歸
然桑梓如舊覽風物之憂思尋王業之艱難惟高祖若
天地之開闢化成萬類惟太宗若日月之照臨光于四
表舉晉陽之甲除君側之盜由唐侯之封升天子之號

肇基發迹實在于茲仙駕無所或顧懷於舊土靈魄無
方儻來歸於北堂郡縣之所宜嚴奉前人有言曰禮不
忘本樂殊其德如姬詠周原而劉歌沛邑思我烈祖如
聞歎息之音嗟爾後人無忘成功之頌頌曰

皇矣上帝臨下有赫降監四海求人之瘼吁彼隋煬其
政不獲眷我高祖此惟其宅天輔臯陶明刑弼教道遵
老氏同元體妙仁表四乳明燭獨照隨父託心史良辨
貌高祖誕靈神光夜耀天妹作合日見夢紹祚生文帝
膺運會昌首唱高祖騫飛晉陽萬夫一心元戎啟行火

五
卷六
旗炎炎雲鳥洋洋五星迓帝萬國謳唐天網恢疎王師
節制威惟連戮老生摧斲山祇引軍河龍渡帝渭倉散
積離宮弛閉關輔來蘇遠方咸惠長安宮室上法太微
隋遷寶鼎唐在璿璣伏入雙闕詔出九圍三靈協載百
祿同歸帝謂太宗表正封略濤蕩颺掃霆馳電爍劔不
摧鋒弩無再曠西平汧隴東取河洛杲密德充頭懸面
縛北走獯鬻南達蠻荆遼碣作又梁岐底平風動神行
海隅蒼生莫不來庭於昭義堂誓衆資始天命所起于
胥頌美維予小子夙夜敬止於戲皇王緒思不忘

臣錢開仕恭校

張燕公集卷七

唐

張

說

撰

頌

大唐祀封禪頌

皇唐六葉開元神武皇帝再受命致太平乃封岱宗禪
社首鑿石紀號天文煥發儒臣志美立碑神壇曰厥初
生人淑有君臣其道茫昧其風朴略因時而欵起與運
而紛落泯泯沒沒無聞焉爾後代聖人取法象立名位
衣裳以等之甲兵以怛之於是禮樂出而書記存焉反

其源致敬乎天地。報其本致美乎鬼神。則封禪者帝王受天命告成功之謂也。閱曩聖之奧訓。攷列辟之通術。疇若天而不成。曷背道而靡失。由此推之。封禪之義有三。帝王之略有七。七者何。傳不云道德仁義禮智信乎。順之稱聖。哲逆之號。杜悖三者何。一位當五行圖錄之序。二時會四海昇平之運。三德具欽明文思之美。是謂與天合符。名不死矣。有一不地而云封禪。人且未許。其如天何。言舊史者。君莫道於陶唐虞舜。臣莫德於臯陶稷卨。三臣備德。皆有天下。仲尼敘帝王之書。繫魯秦之

誓。明魯祀周公用土禮。秦承伯益接周統。聖孔微旨。不其效歟。然秦定天下之功。高享天祿之日。淺天而未忘庭堅之德也。故大命復集於皇家。天之贊唐。不惟舊矣。其興之也。元靈啓迪。黃祇顧懷。應歸運以義舉。撫來蘇以和見。溥也。無放夏之慙武也。無伐殷之戰。高祖創業。西宗重光。有德格天。漏泉蒸雲。濡露菌蠢。滋育氤氳。漸煦若天地之覆。載日月之照臨。溥有形而希鬯幣。無外而宅心。百有八年於茲矣。皇帝攘內難而啓新命。戴睿宗而纘舊服。宇宙更闢。朝廷始位。蓋義軒氏之造皇圖。

也九族敦序百姓昭明萬邦咸和黎人於變立土圭以
步歷革銅渾以正天蓋唐虞時之張帝道也天地四時
六官制禮井田三壤五圻成賦廣九廟以尊祖定六律
以和神蓋三代之設玉制也武緯之文經之聖慕之神
化之然猶戰戰兢兢日慎一日納規誨以進德遂忠良
以代工講習乎無爲之書討論乎集賢之殿寵勇爵貴
經門翼乎鸞鸞之列在庭毅乎貔貅之師居鄙人和傍
感神寶沓至乾符坤珍千品萬類超圖溢牒未始聞記
我后以人瑞爲心初不以物瑞爲異王公卿士儼然進

曰休哉陛下孝至于天政合乎道前年祈后土人獲大
穰間歲祀圜邱日不奄朔祥感以祈聖因事以觀天天
人交合其則不遠意者喬岳掃路望翠華之來上帝儲
恩俟蒼璧之禮久矣焉可專讓而廢舊勛羣臣固言勤
帝知罪至于再至于三帝乃揖之曰欽崇天道俯率嘉
話恐德不稱敢憚於勤其撰巡狩之儀求封禪之故旣
而禮官不戒而備軍政不謀而輯天姥練印雨師洒道
六甲按隊八陣警蹕孟冬仲旬乘輿而出千旗雲引萬
戟林行霍漢燐爛飛燄揚精原野爲之震動草木爲之

風生。歷郡縣。省謠俗。問百年。舉百祀。興墜典。肯闕政。攸
徂之人。室家相慶。萬方縱觀。千里如堵。城邑連歡。邱陵
聚舞。其中垂白之老。樂過以泣。不圖蒿里之魂。復見乾
封之事。堯雲往舜日。還神華靈鬱爛。漫乎穹壤之間。是
月來至於岱宗。祇被齋宮。滌濯靜室。凝神元覽。將款太
一。議夫太山者。聖帝受天官之宮。天孫總神靈之府。自
昔立國。莫知萬數。克升中而建號。惟七十而有五。我高
宗六之而今七矣。非大尊位盛時。明德曠代。遼濶難併
之。甚哉。先時將臻。夫大封也。累封疆于高岡。築泰壇於

陽趾。夫其天壇三襲。辰陞十二成。秩衆靈列座。存次崇
牙。樹羽管磬。鏞鼓宮懸。于重墀之內。于戚鉞及鉤戟。幾
戩周位於四門之外。伐國重器。傳代絕瑞。旅之於中庭。
玉輦金轂。翠冑黃屋。夾之於端路。庶官百僚。羗夷蠻貊。
褒成之後。讓玉之客。序立於禮神之場。髦頭弩牙。鐵馬
金鏃。介冑如雪。旗幟如火。遠匝於清禁之野。於是乎以
天正上元。法駕徐進。屯千乘於平路。留羣臣於谷口。皇
帝御六龍。陟萬仞。獨與一二元老執事之人。出天門。臨
日觀。次沆瀣。宿巉岩。赤霄可接。白雲在下。庚寅祀高祖。

於上封以配上帝命衆官於下位以享衆神皇帝冕裘
登壇奠獻俯僂叶金奏佾羽舞撞黃鐘歌大呂開闔闔
與天語清將信公奉斗布度懋建皇極勤恤蒼生招嘏
乎未兆禳災乎未萌上下傳節而禮成樂遍福壽同歸
而帝賜神策乃檢玉牒於中頂揚柴燎于高天庶忠誠
之上達若憑焄而駕烟日轡方旋神心餘眷五色雲起
拂馬以隄人萬歲山呼從天而至地越翌日尊睿宗侑
地祇而禮社首遂張大樂觀東后國風惟舊無黜幽削
爵之誅王澤惟新有眚災大賚之慶不浹日至化洽於

人心不崇胡景福遍於天下然後藏金匱於祔室迴玉
鸞於上都煌煌乎真聖朝之能事而高代之盛節者也
于斯之時華戎殊俗異音同歎曰兵合多雨山峻多雲
豈有大舉百萬之師克期千里之外及行事之日則天
無點翳地無纖塵嚴冬變爲韶熹寒谷鬱爲和氣非至
德其孰能動天如此其順者乎昔人云自西自東自南
自北無思不服今信知聖人作而萬物覩其心服之之
謂矣或曰祭泰所主先后非禮歟曰是禮也非宜也王
者父事天母事地侑神崇孝無嫌可也且夫柴瘞外事

帝王主之。蒸嘗內事。后妃助之。是開元正人倫革弊禮起百王之法也。故令千載。職末光。聆絕韻。咀甘實。漱芳潤。爍元妙之至精。流不已之淑聲。臣說作頌。告於神明。四皇墳而六帝典。雖吉甫亦莫能名。徒採彼興人之詩。曰大矣哉。維天爲大。惟皇則之。率我萬國。受天之禎。子孫百代。人神共保。綏之云爾而已矣。

大唐開元十三年。隴右監牧頌德碑奉勅撰。

周禮校人掌王馬之政。天子十二閑馬。六種閑爲一廐。馬二百一十六。應乾之策也。六廐成校。五良一篤。是之

謂小備。校有左右。閑成十二。合月之道也。駑馬三良。馬之數凡三千四百五十六。是之謂大備。秦并一海內。六萬騎之國。馬盡歸之。帝家則周制陋矣。漢孝武富文景儉約之積。雄衛霍張皇之勢。勒兵塞上。廐馬有四十萬匹。及東漢魏晉。國馬陵夷。不可復逮。武帝時矣。後魏以胡馬入洛。蹴踏千里。軍陣之容雖壯。和鑾之儀亦闕。大。唐接周隋亂離之後。承天下征伐之弊。鳩括殘燼。僅得牝牡三千。從赤岸澤徙之隴右。始命太僕張萬歲葺其政焉。而奕世載德。纂脩其緒。肇自貞觀。成於麟德。四十

年。間。馬。至。七。十。萬。六。千。匹。置。八。使。以。董。之。設。四。十。八。監。以。掌。之。跨。隴。西。金。城。平。涼。天。水。四。郡。之。地。幅。員。千。里。猶。爲。狹。隘。更。折。八。監。布。於。河。曲。豐。曠。之。野。乃。能。容。之。于。斯。之。時。天。下。以。一。縑。易。一。馬。秦。漢。之。盛。未。始。聞。也。張。氏。中。廢。馬。官。亂。職。或。戎。狄。外。攻。或。師。圍。內。寇。垂。拱。之。後。二。十。餘。年。潛。耗。大。半。所。存。蓋。寡。開。元。神。武。皇。帝。登。大。寶。受。靈。符。水。瑞。感。而。河。龍。出。星。精。應。而。天。駟。下。二。年。春。帝。乃。簡。心。膺。善。畜。之。將。卜。福。祐。宜。生。之。長。俾。領。內。外。閑。廐。使。焉。卽。開。府。霍。公。其。人。也。公。名。毛。仲。姓。王。氏。開。元。佐。命。之。元。

勳。東。國。亡。王。之。後。裔。四。伯。輔。禹。與。治。水。之。謨。四。七。興。漢。在。經。星。之。列。清。明。虛。受。察。含。冰。鑑。籌。謀。先。覺。慮。出。著。龜。竭。無。私。之。忠。而。善。歸。天。造。輸。不。懈。之。力。而。立。同。日。用。故。騰。躍。風。雲。攀。附。日。月。策。功。第。一。承。恩。莫。二。庭。羅。魏。絳。之。鐘。鼓。第。賞。堂。邑。之。山。林。文。馬。蕃。錫。於。晉。侯。御。衣。亟。分。於。韓。信。庶。姜。如。玉。則。降。榮。彤。管。衆。子。垂。髻。則。抱。拜。朱。華。聖。人。之。見。也。必。猶。爾。爲。之。四。顧。而。滿。志。聖。人。之。不。見。也。乃。恤。然。若。無。與。樂。其。天。下。仲。尼。所。謂。是。必。才。全。而。德。不。形。者。也。夫。其。處。身。則。立。無。跂。正。也。視。無。還。端。也。聽。無。聳。誠。

封岱嶽輦輅旣陳羽衛咸備大駕百里烟塵一色其外
又有閑人萬夫散馬千隊骨必殊貌毛不雜羣行如動
地止若屯雲百蠻振聳四方抃躍威懷紛紜壯觀揮霍
迴衡飲至朝廷宴樂上顧謂太僕少卿兼秦州都督監
牧都副使張景順曰吾馬幾何其蕃育卿之力也對曰
帝之福也仲之令也臣何力之有因具上其狀帝用嘉
焉霍公口無伐辭貌無德色朝髦庠齒歆以多之於是
明威將軍行右衛郎將南使梁守忠忠武將軍行右羽
林中郎西使馮嘉泰右千牛長史北使張知古左驍衛

中郎將兼鹽州刺史鹽州監牧使張景遵隴州別駕修
武縣男東宮監牧韋衡都使判官果毅齊琛摠監韋績
及五使長戶三萬一千人僉曰自開府庇我十三年矣
畜有婉息人無乏匱克厭帝心莫非嘉績且如亭西南
兩使六頓八夫藁穀計八十萬工圍石以息人約費其
政一也納長戶隱田稅三萬五千石以儉私肥公其政
二也減太僕長支乳酪馬錢九千三百貫以窒隙止散
其政三也供軍筋膠十萬七千斤以收絹繕工其政四
也時苜蓿首蓿一千九百頃以芟蓄御冬其政五也使

監官料舊給庫物新秦置本牧分其利不喪正錢二萬
五千貫以實府宜官其政六也買死畜貯絹八萬匹往
嚴道市麩僮千口以出滯足人其政七也五使長戶數
盈三萬墾田給食糧不外資以勸農却輓其政八也敢
問監牧之事孰能加于此乎然則稱伐計功前典所貴
上以美舉主擇才之得人下以贊忠臣受任之盡節末
以道官屬承風之成事竟以示後代昭前之令聞是四
烈者不可廢也既而大君有命舊史書功吟咏瓌奇義
刻金石秦汧渺渺尚想非子之風魯野區區猶傳史克

之頌試從此而觀彼夫何足以言哉頌曰

皇天考牧兮聖之君四十三萬兮馬爲羣
塹汗渭兮垣隴坂飛黃阜兮昆蹄苑山崆峒兮水鳴咽泉噴玉兮草
汗血聚如花兮散如雲性旣馴兮才亦絕維國家之大
事駕時龍兮祭天地和鑿發兮文物備維皇帝之七德
摠戎馬兮威萬國彩鬣翻兮金介冑有霍公之掌政擇
張氏之舊命天王駕兮仗黃麾太僕驂兮展駘儀舞月
駟兮躒雲螭神侑儻兮態權奇騏驥溢野兮牛羊日多
子孫榮位兮恩寵如何頌皇靈兮篆石鼓萬斯年兮羣

玉府

廣州都督嶺南按察五府經略使宋公遺愛碑頌
維唐御天下九十有八載蒼生賁乎海隅元澤漫乎荒
外天子念窮鄉之僻陋徼道之脩阻吏或不率不馴人
或不康不若乃命舊相廣平公宋璟鎮茲裔壤式是南
州篤五管之政教總三軍之旗鼓員萬里馴致九譯
詔書下中靡然順風曷由臻斯威名之先路也公曩時
執白簡登瑣闥推誠蹇諤不私形骸忤英主之龍鱗踰
奸臣之虎尾挫二張之銳則聲怛寰域折三思之角則

氣蓋風雷由是極有四星維帝之輔地有五岳維天之
柱其入宰也君之股肱其出守也人之父母至於此邦
之長人也飲食有節衣服有常清心而庶務簡正色而
羣下一。瑟兮僴兮赫兮喧兮固以不怒而威不言而信
雖有文身鑿齒被髮儋耳衣卉麩木巢山館水種落異
俗而化齊言語不通而心喻矣其率人板築教人陶冶
室皆塗墍晝游則華風可觀家撤茅茨夜作則災火不
發棟宇之利也自今始祖國之舶海琛雲萃物無二價
路有遺金殊裔胥易其廻途遠人咸內我邊郡交易之

坦也有如此故能言之士舉爲美談蓋微子去殷以後
王者襄公伐楚將得諸侯尙書東漢之雅望黃門北齊
之令德宋氏世名公其濟美詩所謂無念爾祖聿脩厥
德廣平有焉若夫往者屈也來者伸也往來相召而哀
樂繼之鴻飛遵渚於汝信處龍章袞衣以我公歸鬱陶
乎人思嗟嘆之不足廣府司馬譚瓌番禺耆老某乙等
相與刻石傳徽斯文予春秋之徒也豈將苟其辭哉雅
敬宋公王臣之重次嘉譚子贊德之義遙感耆舊去思
之勤越裳變風知周公之才之美吉甫作頌見申伯于

藩于官觀政將來惡可廢也頌曰

降王宰兮遠國靈歌北戶兮舞南溟酌七德兮考六經
政畫一兮言不再草木育兮魚鼈寧變蓬屋兮改籬墻
魚鱗瓦兮鳥翼堂洞日華兮皎夜光火莫炖兮風莫颺
事有近兮惠無疆崑崙寶兮西海財幾萬里兮歲一來
舟如島兮貨爲臺市無欺兮路無盜旅忘家兮扃夜開
越井岡兮石門道金鼓愁兮旌旆好來何暮兮去何早
爨牛牲兮菌雞卜神降福兮公壽考

龍門西龕蘇合宮等身觀世音菩薩像頌

我聞上古有聖人心入羣有身包大空普觀察一切音聲其名曰觀音菩薩日月有盡光明無際天地有終神通不滅禮其形像隨願而成功稱其名號應時而獲果龍門西龕等身像者此都人士思賢令蘓君之所造也天下之大有五而河洛總其中星居之赤縣有二而合宮是其一。四隩輻湊萬商靡謬政頗財黠刑放寵肺所由然舊矣故強毅臨之則攫斂姦擾虺虐不幸以挨撲睚眦是稱辨吏寬厚處之則乾沒淫詭相詐莫禦以息偃簡怠謂之風流其傷弊一也武功蘇君名頌字廷

碩隋右僕射邳國公之元孫今吏部尚書懷遠公之元子相門華妙儒庭善誦雍容文雅當代知名通才博藝於何不可御史天憲也抗執簡之雄郎官星象也高握蘭之選帝車西幸皇春東溢四方之極一臺歸妙蘇君於是乎始爲政於京邑籍田戶以衍賦徹考資畜以程力任董道逃以業浮廩詰姦慝以豫獎釐制事典以示好惡敦術學以興禮義省法罪獄吏無作威煦郵駟圉人不敗產加以躬親足以勵勤謀始足以作則端莊足以易暴清儉足以息貪夫如是簡往而事行正身而人

張氏公集 卷一
慕輕薄束修而歸厚流亡襁負而來復曾未朞月遷給
事中既而人吏父老聚而謀曰咨休哉明府之惠人也
春風暢之時雨霖之心乎愛矣何以祝之朝廷豈不念
下民之鬱陶乎奚其爲奪我君而不省留也詩曰愷悌
君子神所愛矣庶幾乎三珍依憑百祥臻降云爾乃購
奇匠倣靈峰進琢鏡光鑿鬣電燧倚高壁臨懸關踏石
筍戴珉鬘縹緲雲聳嬋娟玉立摸宰官之形儀現輪玉
之相好諦視瞻仰將莞爾而微笑攝心傾聽疑倦然而
有聲其左右則福地園林香城基地前佛後佛大身小

身亘岑嶺而相望遍虛瑩而無數此身不動觀大地之
衆生徼佛無來見河沙之世界爾其北對宮觀南馳荆
越闕路豁開而中斷伊水逶迤而長注脩途交會車馬
川流帝城風俗是焉游覽如鎮南之峴山似關西之灞
岸暮春桃李上巳清明汎法池之淥波憑靜域之丹檻
揚袂陰景躡步震山花散四天花香開八國以不居之歲
序閱無窮之人代知妙容之常在觀永劫之因緣盛德
相傳與此山而終始不其偉歟昔孔子化中都以攝魯
柎卓茂理于密以致漢治夫樹善有基建功無小蘇君

張燕公集 卷八
春秋鼎盛德業日新方欲驥首天池整翮雲漢致大君
於堯舜紹層構於韋平是宰也故以五輅之推輪九域
之覆篑已重宣此義而說偈曰
大哉元聖心如明鏡深入禪定龍飛清淨觀我佛性靈
相珍飾精窮妙極千崑之側因空見色登我願力不競
不練不剛不柔敷政優優百祿是遵侑我蘇侯

臣劉鳳誥恭校

張燕公集卷八

唐

張說

撰

贊

蒲津橋贊

易曰利涉大川濟乎難也詩曰造舟爲梁通乎險也域
中有四瀆黃河是其長河上有三橋蒲津是其一隔秦
稱塞臨晉名關關西之要衝河東之輻湊必由是也其
舊制橫絕百丈連艦十艘辯脩竿以維之繫圍木以距
之亦云固矣然每冬冰未合春洹初解流澌崢嶸塞川

而下如礎如臼如堆如阜或撻或棍或磨或切繩斷航
破無歲不有雖殘渭南之竹仆隴坻之松敗輒更之罄
不供費津吏成罪縣徒告勞以爲常矣開元十有二載
皇帝聞之曰嘻我其慮哉乃思索其極敷祐於下通其
變使人不倦相其宜授彼有司俾鐵代竹取堅易脆圖
其始而可久紓其終而就逸受無疆惟休亦無疆惟恤
於是大匠歲事百工獻藝賦晉國之一鼓法周官之六
齊飛廉煽炭祝融理爐是鍊是烹亦錯亦鍛結而爲連
鑠而爲伏牛偶立于兩岸襟束於中渾鑠以持航牛

以繫纜亦將厭水物奠浮梁又疏其舟間畫其鷁首必
使奔斯不突積凌不隘新法旣成永代作則原夫天意
有四旨焉濟人仁也利物義也順事禮也圖遠智也仁
以平心義以和氣禮以成政智以節財心平則應諸百
神矣氣和則感生萬物矣政成則又文之經矣財節則
豐武之德矣故天將儲其禎地將阜其用人將盈其力
聖皇之道乾乾翼翼觀藝而無窮詠功而無極

皇帝馬上射贊

第一

甘泉頓射飛野鷄一隻走狐二走兔十四不隔箭連中五隻

一面昭仁三驅示武走則發射伏則不取

第二

中鷹前兔

寒兔滅沒疾鷹逞巧鳴鏑洞飛失雋亡狡

第三

福陽頓同日中狗前兔

狡兔雋犬力奔勢迫持圓驟飛捨拔先獲

望賢頓停日射高飛鴈一隻走驛二走兔三十六不隔箭連中五隻

獸羶山豪鳥落雲雋貫三疊兩血不濺刃

望賢頓中獾狐

夜鳴之鳥是謂獾狐除人之惡應箭而鋪

望賢頓隔馬射中驛

趨趨牙聲寒草全色隔馬百步一縱而側

第四

仙游頓中驛一走狐三走兔十八不隔箭連中八隻

天子省斂薄狩岐陽躬射五十以奉蒸嘗

第五

文山頓射麀不隔箭連中二走狐一走兔二十一隻
我將獻鮮從禽於野一日百中以威天下

第六

武停頓向後射走兔其中射兔十九隻不隔箭連中十
一隻走狐三走麀二

霜兔斗迴雲龍矯過天旋月滿捨矢如破

第七

仙林頓分驥射野狐中

有芄者狐起帝之右分驥遠發應踏于手

第八

鷓子搗鴟不着飛過在後箭射應弦而落
驚鳶上飛鷲集橫捕矯箭爭中紛然旋落

第九

一箭中兩鹿橫貫走五十餘步方倒
雙鹿並出一箭橫貫上思陵寢以獻時鮮

第十

是日還宮苑內用大箭射走鹿四十口分賜諸王郡王及從人等

帝入靈囿數百麀鹿射其四十頒諸羣牧

孔子堂杜預贊

猗歟杜侯發揮孔聖春秋旣立王道以正列國行事君子莫之他人有心予忖度之推凡見例定罪原詞開我後學從祀先師

金紫光祿大夫太常卿上柱國中山郡公崔日知

寫真圖贊

廓哉中山靈宇廟徹逸韻豪爽達音妙絕孝盡思成忠全見節優游宮侶蕭條禪悅白髮傳貌青松拂雪要之歲寒是望邦傑

盧舍那像贊 并序

詩云哀哀父母生我劬勞欲報之德昊天罔極是傷不可止也戀而懷無所及之感其有飾聖以資親修法以展慕豈非孝子持明之心哉武擔山靜亂寺盧舍那丈六鐵像者沙門履徹爲先妣用無價黃金之裝也徹師俗姓劉氏青城真人知古之弟道門釋種守律護戒了

如來廣大之心達如來加持之力見虛空界割縵茶壇
知定慧手結金剛印過去不悟因後行而追福當來未
聞指前緣而證道觀佛相者成一切智承佛光者壞無
始業張說聞其事而懌之乃合掌西南遙禮偈曰
大雄盧舍那妙法甚深秘神變加持力普昇不動位孝
哉彼沙門愛母而錫類法財裝妙色空色不相異慧日
破金山慈光觸寶地善來金剛手一一見佛事

般若心經贊

萬行起心心人之主三乘歸一一法之宗知心無所得

是真得見一無不通是玄通如來說五蘊皆空人本空
也如來說諸法空相法亦空也知法照空見空舍法二
者知見復非空耶是故定與慧俱空中法立入此門者
為明門行此路者為超路非夫行深般若者其孰能證
於此乎秘書少監駙馬都尉滎陽鄭萬鈞深藝之士也
學有傳癖書成草聖酒揮酒手翰鐫刻心經樹聖善之
寶坊啟未來之華葉佛以無依相而設法本不生我以
無得心而傳今則無滅道濟文字意齊天壤國老張說
聞而嘉焉讚揚佛事題之樂石

文靜法下年立字

文靜亦波吾

文靜法下年立字
法

文靜亦波吾
懷作壞

藍田法池寺二法堂贊并序

法池西三歸院二法堂茲寺長老初上禪師所造也禪師本姓彭名至知至性篤孝執親之喪七日不食微言密行志道探玄究易老莊太一之旨善正書與鍾王同格其精至點畫宛秀毫縷必見如折槁荷磨文石筋理灑颯固非人力所致也中朝名士山藪高尚法流開勝遠近慕焉及晚年專意於禪誦平生藝業脫若遺塵矣常嘆曰帝王父母許我出家雨露生成恩猶一揆依如來教創是功德萬一乎獻福二宮潛祐七祖將與一切

咸登道場於是三歸堂以長安元年辛丑子月望日癸未立善法堂以開元元年癸丑丑月望日戊辰建禪師母弟仁琬弟子沙門啟疑及沙彌令哲左右斯業寔有力焉

三歸堂贊

敬告諸佛子一心清淨觀欲求真正道當從信根入是佛虛空相是法微妙光定慧不相離是僧和合義人空法亦空二空亦復空住心三寶空是名三歸處

善法堂贊

至哉初上人建立善法堂彩翠三世佛莊嚴清淨眼能
運無礙心普入於一切見若不染色知若不取色是名
真寔見亦名解脫知佛觀離生滅諸法等如是

益州太清觀精思院天尊贊

并序

蜀山劉尊師上清品人也兄學儒弟奉佛迺畫三聖同
在此堂煥乎有意哉達觀之一致也張說聞其風而樂
之作天尊贊

正氣生神結氣爲實上清尊帝中黃首出華彩衣裳虛
無宮室紫氣乘斗赤鑪鍛日十天從化萬靈受律蓮花

釋門麟角儒術法其不二心同得一道心惟微守而勿
失

銘

并州勅造座右銘

安萬國禮百神放鄭聲遠佞人

進筆硯架銘

筆硯之間聖心必察青蠅導赦震言漏洩

煖硯銘

筆鋒曉凍墨池夜結香炭潛然推寒致熱

素盤孟銘

并序

國子祭酒韋公好遊山水器珍雅素因適湯泉見榱梓
枌榆良材滿谷乃命山工作爲盤孟盞罍樽解呈其文
理素而不飾還都分遣好事者說受賴盤孟三事以銘
之云爾

幽山之木無心世路器爲盤孟制以法度匪丹匪漆惟
眞惟素理眞防毀節全思固多財必傷處盈招惡嗟嗟
君子鑒微在悟寔是天然貽我朋故

石橋銘

玉梁架迴碧沼涵空石鞭海上鎖鍛河中橫漢飛鵲規
天拖虹仙聖來往風雲路通

箴

溫泉箴

東山少蓮曰玄冥氏之子曰壬夫安祝融氏之女曰丁
芋俱學水仙是爲溫泉之神焉帝命之救萬靈滯滯結
腑臟達膚腠泄下人多賴之上帝是崇杆飛廉氏之佚
女妬之常欲大恩其功故入溫泉必齋肅洗心戒以防
患紉以利物含生之疾我願除妖二神嘉之吹湯激邪

珠連漚累滯泊揚華此其効也若入溫泉僻心穢行惡
言淫形居食失節動出躁輕一神醜之不匡人命飛廉
佚女以裾斃人是生瘥芒風瘍眩齟之病夫有意之醫
照合神理無恒之醫身爲慾使莫之益傷之者至矣是
以君子慎其微也

贈別楊盈川炯箴

杳杳深谷森森喬木天與之才或鮮其祿君服六藝道
德爲尊君居百里風化之源才勿驕恠政勿煩苛明神
是福而小人無冤畏其不畏存其不存作誥茲酒成敗

之根勒銘其口禍福之門雖有韶夏勿棄擊轅豈無車
馬敢贈一言

獄箴

官有決曹掌茲法獄匪惟議罪亦以防欲所貴仁恕非
矜窘束吏苟吹毛人安措足古之爲主是戒是勗茫茫
率土蠢蠢羣生賢愚中雜真僞相傾若魚之駭如鳥之
驚不能無狃宜持以平或大或小時重時輕無以快志
期乎得情孰曰非重國之政令孰曰非輕人之性命虐
則招咎寬則納慶宜慎宜恤可畏可敬爲獄則固爲牢

則幽晨嚴管鑰夜密更籌寂寂園十纍纍繫囚求食搖
尾見吏垂頭自昔立名此爲非所逼隘狹室欹傾漏宇
冬有祁寒夏多隆暑焉可失入焉可妄處勿謂無妨勿
謂無傷匹婦含怨三年兀陽匹夫結憤六月飛霜可以
安危可以興亡敢告司憲無輕國章

記

東山記

兵部尚書同中書門下三品修文館大學士韋公體含
真靜思協幽曠雖翊亮廊廡而緬懷林藪東山之曲有

文粹作世氣
朝手
作于

別業焉嵐氣入野榛烟出俗石潭竹岸松齋藥碗虹泉
電射雲木虛吟惚恍疑夢間關忘術茲所謂丘壑夔龍
衣冠巢許幸溫泉之歲也皇上聞而賞之廼命掌舍設
帟金吾勸次太官載酒奉常抱樂停輿替於青霽佇翬
綸於紫雲百神朝乎谷口千官飲乎池上緹騎環山朱
旆熠野縱觀空巷途歌傳壑是日卽席拜公道遙公名
其居曰清虛原幽棲谷景移樂極天子賦詩王后帝女
宮嬪邦媛歌焉和焉以寵德也加以中宮敦序謂我諸
兄引內子於重幄見兒童於行殿家人之禮優棠棣之

詩作於是寔其筐篚下以昭忠信之獻賁其束帛上以
示慈惠之恩朝野歡并君臣義洽夫飛翠華歷茨道至
道之主也紆紫綬期赤松素履之輔也千載一時難乎
此遇故兩曜合舍衆星聚德雅道光華高風允塞寒谷
煦景窮崖潤色猗歟盛事振古未有象之元石貽代厥
後

臣劉鳳誥恭校

張燕公集卷九

唐

張

說

撰

表

請許王公百官封太山表

臣說等言臣聞聖人者與天地合德故珍符休命不可
得而辭鴻名盛典不可得而讓陛下功格上天澤流厚
載三五之盛莫能比崇登封告成理協幽贊故符瑞必
臻天意也書軌大同人事也菽粟屢登和平也刑罰不
用至理也今陛下稽天意以固辭違人事以久讓是和

張燕公集 卷九
平而不崇昭報至理而闕薦祖宗億兆之情猶知不可
況上帝臨照祖宗顧謐其可止乎願納王公卿士列岳
縉紳之衆望迴命有司速定大典臣等不勝懇禱敢昧
死再拜上言

請八月五日爲千秋節表

臣聞聖人出則日月記其初王澤深則風俗傳其後故
少昊著流虹之感商湯本元鳥之命孟夏有佛生之供
仲春修道祖之錄追始尋源其義一也伏惟開元神武
皇帝陛下二氣含神九龍浴聖清明總於玉靈爽朗冠

於金天月維仲秋日在端五恆星不見之夜祥光照室
之朝羣臣相賀誕聖之辰也焉可不以爲嘉節乎比夫
曲水禊亭重陽射圃五日綵綰七夕粉筵豈可同年而
語也臣不勝大願以八月五日爲千秋節著之甲令布
於四方羣臣以是日獻甘露醇酎上萬歲壽酒王公戚
里進金鏡緩帶士庶以結絲承露囊更相遺問村社作
壽酒宴樂名賽白帝報田神上明元天光啓大聖下彰
王化垂裕無窮異域占風同見美俗

請置屯田表

臣說言臣聞求人安者莫過於足食求國富者莫先於疾耕臣再任河北備知川澤竊見漳水可以灌巨野淇水可以溉湯陰若開屯田不減萬頃化萑葦爲秔稻變斥鹵爲膏腴用力非多爲利甚溥諺云歲在申酉乞漿得酒來歲甫爾春事方興願陛下不失天時急趨地利上可以豐國下可以廩邊河漕通流易於轉運此百代之利也當今國儲未贍邊軍未息勸人農業願留聖意亦嘗賜前階之食承後騎之顧竟唯唯而無一言者豈敢隱情於聖主也正以職在仗衛憂於部伍馬上非公

議之所囿遊非朝廷之事今昧死上愚見乞與大臣籌謀速下河北度支及溝渠使檢料施功不後農節謹附賀正使隨軍前曹州考城縣尉同希再奉表以聞謹言
禮儀使賀五陵祥瑞表

右臣等伏以陛下孝通天地親朝五陵拜橋陵則紫氣見獲白兔甘露降白鴿天光清和日色明朗拜定陵則有景雲見甘露降拜獻陵則甘露被樹祥雲抱日拜昭陵則先聖見神遊薦享之際陛下親聞刻息初進服用樂器自然發聲又素像回面甘露降滋從祀先臣歷聞

張燕公集 卷九
蹈舞拜乾陵則有靈草生甘露降日抱戴之瑞此皆陛下虔誠上感神靈福降四海同懽萬方忭躍臣等幸陪大禮親覩頽祥無任大慶之至謹奉表陳賀以聞臣說謹言

集賢院賀太陽不虧表

太史奏太陽不虧聖德上感變災爲瑞陽光增輝陰慝不作休徵之美莫盛於斯臣等無任欣忭之至謹進狀陳賀以聞謹進

賀大衍歷表

臣說言伏以開元大衍歷天旨裁其紀綱日官考其精要履端更始敬授維新加以辨五行之序推七精之數明徵聖期寔光上德臣又見梁天監中陶宏景著玉匱記云盛德木子以肇來運頃者僧一行推璿衡歷得皇家天命成數千年古今祥兆若合符契歷數旣在於聖躬卜年又表於長歷莫大之慶獨冠前王臣忝跡儒林預聞昌運無任抃躍之至謹奉表陳賀以聞

賀示歷書表

臣說等言內侍尹鳳祥至奉宣聖旨內出新撰歷書二

十五卷以示臣等竊窺深奧仰觀英華涉海登山罔知
攸際臣聞唐堯光宅順昊天而定四時虞舜登庸在璿
衡而齊七政伏惟開元聖神皇帝陛下至德廣運文明
濬哲道冠生知與神合契備往聖之能事紹昔王之盛
典發揮易象以應乘乾之時考正歷書更表履端之始
上包二帝下括三王徵晷運之盈虛究推步之疎密備
稽氣象載躔坎離三辰順軌而更明五緯合度而增煥
是使天地貞觀神人允諧唐虞舊章於斯重覩臣等幸
陪書府得預朝門抃躍之情實萬恒品奉表陳賀以聞

賀祈雨感應表

臣說言臣聞水旱常數堯湯固有聖賢之理恭潔爲難
自冬踰春積陽成亢陛下以時災繫政人患由君退巫
女之雩却應龍之請陛下躬自暴露炎景瞻仰雲漢推
心引譴爲人受咎誠旣發而動天言尅期而降雨今已
霖霖三日澤漏重泉草樹含欣郊原變色加以雲平雨
細氣潤風和豈惟優渥王畿必將周遍天下羣心舒釋
聖情開暢無任萬姓歡悅之至謹奉表陳賀以聞

讓兵部尚書平章事表

臣說言伏奉九月十九日制書到并州授臣兵部尚書同中書門下三品王人在門驛騎臨路奉恩循分以慙以惕臣說中謝臣早以書生射策載筆聖朝晚以軍誌典兵秉旄乘塞祿非授進寵是宸衷久待玉階四掌綸誥一心好直三黜其宜今復用之猶夫人也何足以舉明邦政光緝帝猷更策疲驂來塵法駕又臣已受命司籍專意簡書所希散冗因閒就業忽叨劇職責大憂深人心有限事難兩濟國史無成臣執其罪上思薦賢以自代下願守分以全節竊見開府宋璟清介獨立倚法而

不回詹事陸象先清明向道臨事能斷其高明有素歷朝之所仗委其積行無疵象人之所體信揆停住任未盡宿誠乞迴此恩以納來効必能補舊政之缺漏廣前途之軌轍雖深心力臣頗與二子齊驅然校德考年彼皆有一日之長天下者累聖之公器宰相者萬方之具瞻臣所以廷讓彰言不陳密啓伏願聖恩聽輿論而舉衆聖所矚倘朝任得人實海內幸甚無任力微任重惶懼之至謹奉表陳讓

讓封燕國公表

臣說言伏奉今月七日制書封臣燕國公食封三百戶
寵靈猥及中心如惓臣說中謝臣聞至道之時重法守義
上無無功之賞下無無德之祿故授受禮全而踰越不
起伏惟陛下光撫宇內大寧天域百度維新萬靈翹注
建侯疏壤允答元功臣亦何人首膺是命自古有道而
爵說經而封蓋以訓蒙成聖資師通學臣之侍講有異
前聞何者大明朝昇螢燭無助時雨文濡浸灌焉施幸
得依附光景游泳渥澤豈敢虛承啓發之恩謬荷將就
之報且如人臣之義二則爲罪一心不回愚知之分譬

如犬馬有不背之性草木有不彫之理知何德於天壤
而欲蒙造化之偏施哉臣之無功正與此類叨恩過量
終懼且慙乞迴聖慈以容介節無任惶悚之至謹詣朝
堂奉表陳讓以聞

讓中書侍郎表

臣說言伏奉制書除臣中書侍郎寵命俯臨驚魂自失
臣說中謝臣聞雲構鬱起非枳棘之任天波暴集寧溝澮
所容臣識無通方文不經國南宮華省已忝前行西垣
內閣將陪近侍心慙官謗跡愧時流何以承掌圭言贊

決機務當今二儀再造百度皆新太平之基惟賢是與
混成庶政責在中書豈以常才敢膺首選乞寢恩命改
擇時髦惟慎庶官以諧僉議無任悃款之至謹詣朝堂
奉表陳讓以聞臣所讓人別狀封進

讓右丞相表

臣說言伏奉制書除臣右丞相兼中書令臣學慙稽古
早侍春官階緣舊恩忝竊樞近雖愚致君堯舜而才謝
伊臯屬升中大封方求俊乂猥升端右實愧朝行乞停
新令獲守舊職辭納情懇希垂察諒無任屏營之至謹

奉表陳讓以聞

第二表

臣說言伏奉今月十日制書除臣尚書右丞相恩命自
天戰跼無地臣說中謝臣少長儒門墾鑿墳史才非高格
官不因人徒以命偶龍興位階鴻漸五入西掖七踐南
宮中間拙延謫放直招玷缺傷矢之禽聞弦虛墜賜環
之客聽歌先泣此則魂爲危感氣由懼奪安可重收廢
器再辱端揆何以師長禮闈正持憲府當今典章革故
風教鼎新野無四隱朝有三傑具瞻之地願擇時髦臣

幸沐遺簪墮履之恩好生養志之德朝遊簡牘暮對圖書受賜無涯循榮過分豈更干處士之橫議招匈奴之遙哂艾骨自瘡負乘致寇雖則愚情懷戀覲冒求寵亦望聖慈限約令度餘年願停今授長守舊史罄陳肝膽非敢飾讓謹詣朝堂奉表自乞臣說誠惶誠恐頓首頓首死罪死罪謹言

讓中書令表

臣說言伏奉今月十一日制授臣中書令恩渥自天震越無地臣說中謝伏惟陛下至孝安親大功定國六合翹

首席政惟新雍熙之化望在茲日中書理本臣叨首名將何以翊贊聖君光澤天下自臣攝官禁掖已涉七旬不知賢才以舉是不仁也不辯不肖以退是無勇也何足以備乎宰臣胡顏冒恩復受真拜臣之黜執正在於此不敢繁詞以塵聖聽乞迴榮授改擇時髦無任懇款之至謹詣朝堂奉表陳讓以聞臣所讓人別狀封進

讓平章事表

臣說言臣伏奉宣旨制書以臣同中書門下平章事承命戰汗拜舞失容臣說誠惶誠恐頓首頓首死罪死罪

臣本書生器識凡近仕不望於通顯祿只宜於代耕蒙
時寵榮越踐臺閣局心守職竊所庶幾長算經邦則無
逮及伏以廟堂寄切軍國務殷循涯甯分非臣攸處爲
國者爲官擇人爲臣者陳力就列若志小謀人力微任
重豈敢顧惜微軀實恐上塵王政是以披露肝膽不暇
飾詞乞停此授備遂誠情無任怖懼慙惶之至謹詣朝
堂奉表陳讓以聞

讓起復除黃門侍郎表

草土臣說言臣私門凶咎喪紀未終不自毀滅苟存聖

代忽降制書復臣工部侍郎尋奉後命授臣黃門侍郎
震駭失圖哀怖殞絕臣說誠惶誠恐頓首頓首死罪死
罪臣弱年早孤母氏訓立得紹其構忝列簪裾從官歷
年晨昏多闕播遷遠裔離別又苦顧復無答報養何追
心所摧感語不能喻甫至冬中禮及祥禫今已春暮瞻
言幾何是臣事朝廷日長戀几筵日短乞寢嚴命許達
私情訴衷祈天所望矜遂無任荒迫之至謹朝詣堂路
左奉表乞哀以聞謹言

第二表

草土臣說言臣在疚承榮布哀陳欵精誠無感天睠未
廻假喘殘生悲懼轉集臣說誠悃誠恐頓首頓首死罪
死罪臣聞苦者不覺聲哀窮者貴其言達情有至切辭
無敢隱臣爲少子慈愛所鍾每一離別輒加憂憫况臣
生年多故違隔私庭終堂之日身限公事存旣數違左
右沒復不畢几筵痛心自傷特殊人類臣今望延數月
企及再期乞恩無多報國非晚冒死重請冀蒙哀遂無
任懇迫之至謹詣朝堂路左奉表陳乞以聞

第三表

草土臣說言臣荒喘窮情再瀆旒屐懇誠不到未感天
心誓將冒死祈恩分外謝臣本書生門非代祿數葉單
緒族無親房臣父遭憂曾祖未葬臣有兩兄一妹甥姪
九人又有中表相依尚成百口吉凶衣食待臣以辦臣
今拜職黃閣侍奉丹墀厚祿清班一朝改官舉宗榮賴
爲幸過甚人情所欲豈合稽恩正以熒熒苦心有所未
盡臣亡母在日朝夕誠臣以臣獨立無徒好直多忤知
予者母果驗所言往罹大獄竄命炎海晨出晚歸貽慮
非一况涉危難傷心幾途追計生平倍增摧慕侍養日

少違離日多即臣母憂臣以終身臣其忍服縗以從事
情既不同常例望在特降殊恩臣先患風緩近加虛痺
陛下倘從臣數月容過再期非但寬其哀疚固亦全其
生理亡身報國庶竭後圖木植有性枉之則折人願在
心違之則苦雖強爲用將何以堪銜泣仰天冀蒙哀允
無任懇迫之至謹詣朝堂路左奉表陳乞以聞

謝觀唐昌公主花燭表

臣說言內侍尹鳳祥宣勅賜臣觀唐昌公主花燭伏以
天人下嫁王宰送行苟非榮寵何階瞻望臣免歸餘叟

忽承朝請之恩廢駕羸驂復覩肅雝之禮鴻私所被枯
瘁生光無任歡荷之至謹奉表陳謝以聞

諫內宴至夜表

臣聞上天示下災祥將以誘導人主先王仰觀休咎亦
以順修政教易曰天垂象聖人則之言天人之際感通
必矣臣伏見去年十月十七日月滿猶望應虧不虧今
月十七日亦未少虧此易常之異也夫月者至陰之氣
臣下之家當助天作明順期盈缺若過盛逾時盈縮乖
度得非臣下之咎而上天之誠耶伏願陛下深察熟思

而預防臣又見近日內宴夜深方罷小臣無識抑所未
安王在在鎬凱樂飲酒此滅大雅之美也臣卜其晝未
卜其夜此蓋春秋之義也伏願陛下宴樂之餘不及於
夜臣職忝補闕昧死陳愚謹言

進鬪羊表

臣說言臣聞勇士冠鷄武夫戴鶡推情舉類獲此鬪羊
遠生越雋蓄情剛決敵不避強戰不顧死雖爲微物志
不可挫伏惟陛下遷良家於六郡求猛士於四方烏無
遁材獸不藏技如蒙効奇靈圍角力天場却鼓怒以作

氣旋躑躅以奮擊跌若奔雲之交觸碎如轉石之相叩
裂骨賭勝濺血爭雄敢毅見而衝冠鷲狼聞而擊節冀
將少助明主市駿骨掛怒蛙之意也若使羊能言必將
曰苦鬪不解立有死者所賴至仁無殘量力取勸焉臣
緣損足未堪履地謹遣男駙馬都尉埴謹詣金闕門陳
進輕冒宸嚴伏深戰越

進佛像表

臣說言去年行塞至朔州忍辱尼寺見有高祖太宗造
金像銀趺刻題尊號彼州士女屢瞻佛光臣懇思聖心

如在天咫尺伏以皇帝事業遠存荒塞拯溺救焚身勤慮
苦歸誠佛寶何神不據信知功遍區域澤周生人心憑
神靈躬履危險故皇天眷命奄有邦家後嗣聖人欽承
大寶所當思由積德而興帝系本艱難而成王業先聖
一心奉佛者蓋爲百姓求福也陛下爲繼文之主實創
業之功再廓氛祲重安廟社垂統萬億同符祖宗夫惟
興王必藉佐命咸有一德克享天心書曰非天私我有
商惟天佑于一德非商求于下民惟民歸于一德功臣
同德可不念哉物有小而感深事有微而傳遠臣謹將

金像隨表奉進謹言

進渾儀表

臣說言臣聞迎日授時莫先於歷象先天成務必歸於
制作伏惟開元神武皇帝陛下建中立極緯武經文至
德難名神功莫測於是定歷成歲立象考天紹唐堯欽
若之文繼虞舜在璿之義上皇能事於斯備矣臣書院
先奉勅造游儀以測七曜盈縮去年六月造畢進奏又
奉恩旨更立渾儀臣等准勅令左衛率府長史梁令瓚
檢校創造於是博考傳記舊有張衡陸績王蕃錢樂之

等並造斯器雖渾體有象而不能運行事非經久旋即
毀廢臣今按據典故鑄銅爲儀圓以象天使得俯察上
具列宿赤道周天度數注水激輪令其自運一日一夜
天轉一周又別立二周輪絡于天外綴以日月令得運
行每天轉一匝日行一度月行十三度十九分度之七
凡二十九轉有餘而日月會三百六十五轉而行匝仍
置水櫃以爲地平令儀半在地上半在地下晦朔弦望
不差毫髮又立二木人於地平之上前置鐘鼓以候辰
刻每一刻則自然擊鼓每一辰則自然撞鐘皆於櫃中

各施輪軸鉤鍵交錯關鎖相持轉運雖同而遲速各異
周而復始循環不息陰陽不能逃其數度分不能隱其
時究天地之回斡極乾坤之變化斯皆上稟聖謨旁獲
神助臣等愚思非所能及望錄付史館宣示百寮使知
告成之功迴越前古無任勤懇之至謹隨表奉進以聞
臣說誠惶誠懼

幽州論戎事表

臣說言伏以先帝以臣踐履忠孝使臣啓發聖明故得
侍讀春闈夙承天眷洎於中歲兼掌樞密內當沸騰之

口外禦傾奪之勢陛下監撫旣安自天所佑然臣叶贊之意神明啓之開元之始首典鈞軸智小任大福過災生出守三州遠離六載曲直非已升降由人惟君知臣事不待說今旣牧邊鎮委重戎麾竊以兩蕃共和能識同異九姓遠聞撫納欲恃賊殺無侵擾之慮保兩蕃受徵發之期臣愚料之恐未然矣何者賊殺新立必逞兵所加必收九期若去兩蕃搖失九姓雖屬并州節度然其幽州密邇脫有風塵何所不至臣熟聞幽州兵馬寡弱卒欲排比未可卽用城中倉糧今無貯積事未逼迫

臣寔憂之伏乞聖慈深以垂意博詢舊將豫爲籌畫事若早圖必無後悔且孤臣總衆易起猜嫌寬大失濟事之宜嚴整招怨贖之謗遠辭天聽臨事回惶如有論告臣身奏劾軍事者乞追臣面問對定實虛則日月無可蔽之期幽遠有目通之望伏乞畱書在內時加矜察

臣劉鳳誥恭校

張燕公集卷十

唐

張說

撰

表

并州論邊事表

臣說言臣說頓首死罪死罪言臣聞小忿不忍延起大患小罪不寬迫成大禍契丹奚背恩誠負天地不容之責然原其狀本是兩蕃君臣不和自相誅戮耳伏望聖慈且使其族類在朝者將勅書再三告讓因其所欲立酋長而更定之或可不戰而定也必告之不訓則大發

張燕公集 卷十
兵馬東召韃靼西舉九姓來春未青數道齊入單于之首可拾而取未爲晚也天恩若不忍以中國勞事蠻夷則嚴兵備塞棄兩蕃如糞土耳又許欽淡擁二萬餘兵據五丈之城有糧卽守不可拔無糧卽鼓而行何所慮也今遣使獻非時遠抄近掠其實甚難萬一未捷賊氣轉壯下臣愚昧不敢隱情伏望聖恩再加裁度臣說誠惶誠恐頓首頓首

百官請不從靈駕表

臣某等言伏以靈駕首途聖恩攀從國計非便羣情不

安冒昧上所未蒙哀允跪拜還旨載深惶惕臣某等誠惶誠恐頓首頓首死罪臣聞古者天子上法天心下極私情不違衆欲以順人理國爲孝以克己制心爲禮是故凡聖異禮公私殊制私心獨展凡人之孝萬姓感善聖人之孝也陛下行堯舜之事以萬姓爲心奈何守曾閔之節懷獨展之願臣等囂囂竊所未曉且永淳以後關輔流散近適旋定人猶未足今山陵起築役徒摠萃彌春涉夏爲費宏多若陛下此行羣司畢從於人取給臣實難之水旱小愆農慮非淺東都則水漕淮海易資

監穀之糝陸走幽并近壓戎夷之便朝命新復人望在
安宜應靜鎮未可移動陛下若俯順羣願留撫都人則
其安若此如不勝私情攀奉靈駕則其慮如彼况扈從
兵馬既不預集行宮廩蓄又未先備發期甫爾支計闕
然倉卒敦迫必不堪辦若待陵寢既安霜露終感三農
歲稔萬乘時巡奉園廟以展虔瞻日月以何遠今固將
抒私戀棄羣言忘人力費國用此實非陛下安集新業
之圖亦恐非先后憐憫遺人之意且朝廷故事典章猶
在獻陵追遠太宗不至于三原昭陵上遷高宗不至于

九寢豈先帝私懷不逮故事羣臣公議之所奪也伏願
仰遵舊訓顧定新基屈至性而順羣情抑小節而成大
孝使軍國長算咸洛皆安邦甸窮人賦斂少減萬姓翹
望寔深至願百寮結誠期於死請無任悲迫之至謹詣
朝堂奉表固請以聞

爲留守奏慶山醴泉表

臣某言臣聞至德洞微天鑒不遠休徵祕景時和則見
是知縣代曠歷慶牒祥經帝王有必感之符神靈無虛
應之瑞伏惟天冊金輪聖神皇帝陛下金鏡御天璿衡

考政欽若元象宏濟蒼氓茂功將大造混成純化與陽
和俱扇朝百神之樂職宅萬國之權心嘉氣內充淫雨
外息豈止搖風紀月之草列時於階除儀簫銜籙之禽
相鳴於戶闕而已固有發禎厚載抽貺泉源表元德之
潛通顯黃祇之昭報臣於六月二十五日得所部萬年
縣令鄧國忠狀云六月十四日縣界霸陵鄉有慶山見
醴泉出臣謹差戶曹叅軍孫履直對山中百姓檢問得
狀其山平地湧拔周迴數里列置三峯齊高百仞山見
之日天晴無雲異風雲之遷徙非崖岸之騫震歛爾隆

崇巍然蒼鬱阡陌如舊草樹不移驗益地之祥圖知太
乙之靈化山南又有醴泉三道引注三池分流接潤連
山對浦各深丈餘廣數百步味色甘潔特異常泉比仙
漿于軒后均愈疾于漢代臣謹按孫氏瑞應圖曰慶山
者德茂則生臣又按白虎通曰醴泉者義泉也可以養
老嘗出於京師禮斗威儀曰人君乘土而王其政太平
則醴泉湧潛潭巴曰君臣和德道度協中則醴泉出臣
以五行推之六月土王神在未母之象也土爲宮君之
義也水爲智工爲仁水伏于土臣之道也水相于金子

之佐也今土以月王而高水從土制而靜天意若曰母
王君尊良臣善相仁化致理德茂時平之應也臣又以
山爲國鎮水實利人縣有萬年之名山得三仙之類此
蓋金輿景福寶祚昌圖邦固不移之基君永無疆之壽
自永昌之後迄于茲辰地寶屢昇神山再聳未若連巖
結慶並泌疏甘羣瑞同區二美齊舉高視古今曾無擬
議信可以紀元立號薦廟登郊彰賁德齡愉衍萬宇臣
辱司京尹忝寄留臺牧西夏之疲人荷東蕃之餘寵游
泳鴻沛神禧嘉祉物感有歸光啓茲部喜覩殊觀實百

恒流踴躍一隅馳誠雙闕伏請宣付史館頒示朝廷無
任鳧藻之至謹遣某官進圖奉進

爲畱守奏瑞禾杏表

臣聞天微地杳惟聖能通物寶靈禧在德斯感伏惟天
冊金輪聖神皇帝陛下覆翼萬方植生羣類化行至道
風流太和白耀青光日日月之瑞赤文元甲手河洛之
符旣慶溢于山泉又嘉賁於草木臣今月三日得所部
萬年縣令鄭國忠狀言縣界內霸陵鄉新出慶山南出
醴泉北岸有瑞杏三樹再葉重花嘉禾三本同莖合穗

臣謹差司兵叅軍鄭味元檢覆皆實臣謹按孫柔之瑞
應圖曰嘉禾者五穀之長也王者德茂則生昔炎帝教
治人心而嘉禾秀周公理合大道而嘉禾豐臣又以事
可理推物有類驗蜀桑異葉李定知其有祥漢木奇枝
終軍以爲無外今植物搖落而瑞杏繁滋所謂仁育之
風行於肅殺之序此蓋聖道隆渥靈祚和多朱萼素花
彰孝理於詩傳一莖九穎合德耀于祥經曠代殊珍崇
朝累集方俟山流石髓杏茂仙林醴挹軒漿禾登堯膳
受天介福錫帝長齡覲王母於崑臺朝神人於谷口今

綠苗尚稔黃粒未成當須晚秋不獲早獻臣忝尹茲部
頻矚洪休抃躍之誠倍萬常品

爲畱守作賀嶠山表

臣聞山川變見如來有得道之祥國土遠移至人任不
思之力伏惟皇帝陛下宏惠福深勤人願滿蓮花授記
應上聖之降生貝葉開圖握大雄之寶命司戶參軍孫
履直伏承臣奏所部萬年縣新出慶山醴泉乃有天竺
真僧於春首獻狀若以梵音所記此是祇闍山恒河沙
佛必經林下虛空衆聖堂處巖間隱見外方湧秀巾土

明... 卷一
岑泉可識體類宛然感應十號之尊示見千輪之主此
實天威無礙地寶有歸化焜燿於成理窈冥於言說
但瞻三山丹壁奄靈鷲而飛來三泉潑池逐神龍而吐
沃峯高八百協周室之隆基地得萬年神皇靈之資始
儒書分載望偈希聞加以堅固開林吉祥被草重花瑞
杏藻岫紅源九穎嘉禾葱鬱黛壑原臨白鹿識鹿苑之
仙遊路邇朱城悟王城之鍾聽方俟迴輿雪嶺厭香積
於羣臣沈璧天池蔭靈枝于下國吹法螺而朝玉帛乘
瑞象而會天人濫宇流觀殊隣浹慶臣守符京郡奉神

嶽於郊畿係葉皇柯仰慈雲于雨露喜抃之極倍百恒
誠

爲畱守奏羊乳贖表

臣聞靈感無方每先時以見象神鑒不昧必憑物以示
人有德著而休歸或祥來而事應伏惟天冊金輪聖神
皇帝陛下端冕馭天舞干柔遠南越瑞貢久通譯而歸
仁西域奇山近隨方而應聖臣今月得所部萬年縣令
鄭國忠狀送新出慶山下殺牝羊乳贖麕一頭狎擾因
依動息隨戀如從所產若素同羣理有可嘉事無前例

竊以異類相育外方慕化之徵野畜自馴荒服來王之兆必有遠夷企踵歡心百獸之庭獮俗懷音稽顙三乘之會臣言可驗翹足是期昔馬或生羊易占得人安之體犬時養旣天鏡顯代康之文援此比蹤實爲同貫况復晨飲醴浦夕下靈山翳仙杏之奇花拾嘉禾之餘穗羊禎甚玉鬯慶如銀晦朔未移祥符累集福應之盛前古未聞臣忝尹京都屢薦嘉瑞抃躍之至兼倍恒流謹差某官奉表隨進

爲畱守奏嘉禾表

臣某言臣聞天聽自人神和在德代非乏瑞罕遇交泰之期福不虛徵必自休明之主伏惟天冊金輪聖神皇帝陛下仁覆萬靈孝理四海功罔高於尊祖道莫大于配天嚴備郊禋崇肅宗祀秩百王之禮兼六代之樂化溢膠庠訓優更老政每光于帝籍役不奪于農時嘉氣橫浮祥風紛洒騰文煒色九光連合于貞明逸輦殊輪百寶駢滋於動植臣今日奉進止告望鳳臺山泉之端其日于東山栢城內得嘉禾一本臣初見衆苗亘隴香穎垂秋嘉翫繁滋欲觀稔粒左右無識折以呈臣異

其綠葉緩舒蔥芒璧秀熟視奇狀乃知嘉祥下則異畝
合塋上又同延雙穗昔雍熙之代理政之君雖導出應
時而生不擇地未有託根神域彰孝德之能深吐秀壽
宮助粢盛之豐潔此蓋睿誠通感天佑降祥中占以來
未覩斯美臣籍慶宗枝久沐星潢之潤躬持瑞穎預奉
天保之符忭悅之誠倍兼恒品

爲清邊道大總管建安王秦失利表

臣攸直言今日某往峽石山稱前軍王孝傑等以某日
失利於峽石山忽聞殞絕心摧魄死上孤天威下慙士

卒死罪死罪頓首頓首臣以驚怯謬職戎麾銜戴恩榮
統率將士驅關隴之馬引淮海之餉旗幕亘於邊城弓
甲傾於內府不堪任使撓失節度羣帥無決勝之功偏
師有挫衄之咎憤結靈祇怨毒骨髓臣實其罪罪非他
人忍恥苟全遠愧胡顏之責引慝遘死內負猶鬪之心
蹶踏無顏進退靡處臣旣不建帥律有干常憲合卽嚴
科以塞重責然以見在兵馬交要部統未敢束手軍事
委置旌節稽緩刑書伏深兢戰特乞更召嚴猛代臣統
帥請歸罪司寇以正國刑囚伏邊陲唯待斧鉞

爲建安王謝賜衣及藥表

臣某言伏奉月日恩賜臣衣及藥渥流璿極彩溢旌門
拜捧戴舞載欣載越臣受律虧方扞城無寄偏師不振
逋寇仍滋進慙計日之功退任踰時之咎誠合歸罪司
寇以厭深責豈圖天寵猥臨宸慈寬假當從褫服轉承
且吉之衣宜肆典刑翻加有喜之藥毀車夷馬復振鸞
和窮炭枯莖重敷榮燭躡影邊塞馳心闕城微命易投
生成難謝無任感戴

爲建安王讓羽林衛大將軍兼檢校司賓卿表

臣某言伏承月日刺書除臣右羽林衛大將軍兼檢校
司賓卿朝榮封及恩露洪垂罄仰驚抃環揆慙失臣某
頓首頓首臣席慶皇枝屏司天衛素官成責久盈人口
頃屬山戎自擅王師震加謬當推轂之禮竟空汗馬之
績實賴睿謨幽贊靈兵潛討靖烽塵於遼海卷旄麾於
燕薊臣得歸功北闕待罪東藩沐沐休貺生死榮幸安
敢賣要塞而告勞貪天功以爲已又况羽林清禁上則
星辰主客命卿下法河海蓋文武具美方議望僉歸豈
臣弊劣所堪尸忝伏乞特迴瞻鑒更擇能賢俾朝興薪

強壯公集 卷一
標之歌臣免伐檀之刺非敢飾讓實披誠請無任悚戴
之至謹詣朝堂奉表陳讓以聞

爲薛稷讓官表

臣稷言伏奉制書除臣工部尚書寵靈俯逮營魄震飛
揣分何階戴恩無力臣某中謝臣才乏濟川功微橫草故
以業承薪構澤潤葭苧効雕蟲之薄技蒙金燠之榮飾
徒參進對愧無好詞頃以冗職東垣暫諧清曠今若統
司南省將招素餐五翟之正典事斯重六官之長求人
未易以臣叨受寡謂非宜願寢前恩致命他士無任悚

懼之至謹詣朝堂奉表陳讓以聞臣所讓人別狀封進

爲郭振讓官表

臣某言臣本書生幸事先帝歷踐清職遂參機密宗武
樹黨忿嫉正人猜忌眉睫構結瘡痍臣與一二貞士指
天誓心枝梧羣邪捍城王室曉入宮省暮不望歸艱危
備嘗幾不免禍日覲一日以逢開泰臣之宿圖今已足
矣陛下寶位旣復元良又定凶讎咸剪百度惟新正宜
博採屠釣大變風俗豈臣微才空忝重任外不厭於衆
望內實猥於多言但父年老先嬰風疾五月已來不離

枕席臣方寸已亂短效無施夙夜在公扶持有關乞免
官秩歸侍私庭罄心仰恩期於孝治無任懇迫之至

謝修史表

臣某言伏奉今月十六日勅令臣在家修史搯恩戴命
且喜且慚臣服道儒門策名昌運掌綸四后載筆三朝
階緣宿遇登躡端揆職爲劇於心盡史無用而功廢自
貽官謗待罪私門反魯之感徒深藏周之望已絕豈意
特流天旨重緝簡書雖才慚左邱而時盛周漢况復編
堯舜之年事皆目覩叙義黃之德言匪傳聞善志將訓

于百王寔錄可貽於千古國家之鴻業辦矣朽臣之至
願畢矣不勝天恩難任之至謹奉表附內侍尹鳳祥陳
謝以聞

謝賜碑額表

臣說言伏奉今日恩旨賜先臣碑額悲荷交心拜捧以
泣臣某

中謝

臣亡父先臣隲安貞下位不待昌辰先帝贈

之以崑城陛下日之以積善光賁重渥感慶三泉舉宗
悲喜外姻歡賀昔孔象吳札之墳秦存展季之壟事輕
列國義小陪臣豈若天王禮士鳳書旌墓榮軼曩賢道

映來籍在臣在子移孝爲忠心効草木何酬雨露無任
幽明感戴之至謹奉表陳謝以聞

謝京城東亭子宴送表

臣某言力士至奉宣勅以臣臨岐特令賜宴恭承惠渥
念及庸微天地同仁木石知感不勝惶悚戴荷之極臣
某中謝臣歷觀自古君臣凡所際會或因緣黨進或延接
功成故未竭而知不言而信豈有地孤援寡衆謗深
察蒙蔽之中致曠蕩之外逢陛下特達之遇當陛下聖
明之朝事出非常澤深恩重今者誓將瀝血未足竭誠

徒欲殺身豈能報德不如勵精勤政與直守公酌陛下
憂人之心行陛下宏道之化安敢失墜以負神明但函
關路遙長安日遠不任戀主悽愴之至

謝賜鍾馗及歷日表

臣某言中使至奉宣聖旨賜畫鍾馗一及新歷日一軸
者猥降王人俯臨私室榮鍾睿澤寵被恩輝臣某中謝臣

伏以星紀迴天陽和應律萬國仰惟新之慶九霄垂湛
露之恩爰及下臣亦承殊賜屏祛羣厲續神像以無邪
允授人時頒歷日而敬授臣性惟愚懦才與職乖特蒙

聖慈委以信任旣負叨榮之責亦懷非據之憂積愧心
顏難勝惕厲豈謂光迴蓬華念等勲賢慶賜之榮賤微
常及感深犬馬戴重邱山無任感荷之至

荊州謝上表

臣某言伏奉二月二十五日制書除臣荊州大都督府
長史拜命荒服浮舟端泝以今月十七日到州上訖山
列楚望水橫南紀德非羊祜迹謝宋均何以鎮靜流亡
攘除猛暴臣某中謝臣宿濫宸睞累塵榮獎福過生災至
剛多缺及一辭庭闕已涉五年不有自白之書竟無因

人之請天光獨照雲霧頓披窮鱗更躍鍛翮仍翥揣分
瞻恩何階及此媿乏才能不足宣暢皇風敢竭心力少
冀上酌元造無任欣怵兢惕之至謹附送丁匠資使所
部文林郎守公安縣主簿封希魯奉表陳謝以聞

謝問表 元宗

臣說言內給事高力士至伏奉墨制聖慈綢繆言及舊
昔拜舞捧讀且驚且喜臣聞漢主眷驂乘之臣魏君憶
同遊之客誠以故舊不棄而光陰易往今之聖情實過
於昔臣曩蒙侍文北閣陪宴東堂庭闕一遙寒暄二載

不意逢春之草承清露之惠渥容光之隙引遲日之暉
華無任何恩戀主之至謹附高力士奉表陳謝以聞

謝賜藥表

臣某言去年某月日於右銀臺門蒙天恩引對特承慰
問攝理無方以致熱疾緣在假內不敢奏聞聖慈憂軫
詔使臨門伏枕在床雖體氣未適趨風拜命覺腠理遂
平恩榮豈止於邱山朽質永延於龜鶴無任感戴之至
謹奉表陳謝以聞

岳州刺史謝上表

臣說言伏奉四月十有二日制書除臣岳州刺史廿月
二十七日遞書到相州承恩悼怖狼狽上道以月一日
至岳州上訖臣以昔侍金華過蒙榮寵負乘招寇日待
譴黜聖慈遲迴仍委符守刻肌刻骨誠願上報恩私無
術無才將何克宣風化夙夜慙惕胡寧啓處伏以貶官
到任理任速聞不敢循常稽緩附使無任荷恩竦懼之
至謹遞表陳謝以聞

爲僧普潤辭公封表

僧普潤言伏奉甲寅制書以普潤加榮沐秩授邑封公

聖恩無涯將變枯朽佛法有效誠願住持普潤自剃落
壞公五十餘載心不見是口不言俗因誠證業憑禪悟
理幸逢皇祚特啓大運有歸皇太子逼畏凶讎永懷興
復憂虞之際始蒙顧問貧道起廣救之悲決必成之策
奉符命之旨贊無畏之心今得衆生又安羣魔消伏任
於法侶所願爲多視身本無何功受祿天位有德陛下
享之天討有非太子行之豈貪天之功以爲己力竇佛
之法而求身利必若冒榮背律返俗違真亦恐乖陛下
崇信之誠失如來付屬之義凡所稱述諸佛證明伏惟

聖慈亦垂開領乞停恩授以幸法門無任護戒傳道之
至願謹詣朝堂奉疏陳情以聞

臣秦恩復恭校

張燕公集卷十一

唐

張

說

巽

疏

諫避暑三陽宮疏

陛下屯萬乘幸離宮暑退涼歸未降還旨愚臣固陋恐非良策請為陛下陳其不可三陽宮去洛城一百六十里有伊水之隔嶠坂之峻過夏涉秋水潦方積道壞山險不通轉運河廣無梁咫尺千里扈從兵馬日費支給連雨彌旬卽難周濟陛下太倉武庫並在都邑紅粟利

器蘊若山邱奈何去宗廟之上都安山谷之僻處是猶
倒持劍戟示人罇柄臣竊爲陛下不取夫禍變之生在
人所忽故曰安樂必誠無行所悔此不可止之理一也
宮城褊小萬方輻湊填城溢郭併鋪無所排斥居人蓬
宿草次風雨暴至不知底托孤惇老病流轉衢巷陛下
作人父母將若之何此不可止之理二也池亭竒巧誘
掖上心削巒起觀竭流漲海俯貫地脉仰出雲路易山
川之氣奪農桑之土延木石運斧斤山谷連聲春夏不
輟勸陛下作此者豈正人耶詩云人亦勞止汔可小康

此不可止之理三也御苑東西二十里所出入往來雜
人甚多外無墻垣禁籞內有榛叢谿谷猛獸所伏暴慝
是憑陛下往往輕行警蹕不肅歷蒙密乘嶮巖卒然有
逸獸狂夫驚犯左右豈不殆哉雖萬全無疑然人主之
動不宜易也易曰思患豫防願陛下爲萬姓持重此不
可止之理四也今國家北有外寇覲邊南有夷獠騷徼
關西小旱耕稼是憂安東近平輪漕方始臣願陛下及
時旋軫深居上京息人以展農修德以來遠罷不急之
役省無用之費澄心澹懷惟億萬年蒼蒼羣生莫不幸

甚臣自度芻蕘十不一從何者沮盤遊之娛間林沚之
玩規遠圖而替近適要後利而棄前歡未沃明主之心
已戾貴臣之意然臣血誠密奏而不愛死者不願負陛
下言責之職耳輕觸天威伏地待罪

諫潑寒戲疏

臣聞韓宣適魯見周禮而嘆孔子會齊數倡優之罪列
國如此况天朝乎今外蕃請和選使朝謁所望接以禮
樂示以兵威雖曰戎夷不可輕易焉知無駒支之辯由
余之賢哉且潑寒胡未聞典故裸體跣足盛德何觀擇

水投泥失容斯甚法殊魯禮褻比齊優恐非干羽柔遠
之義樽俎折衝之禮

狀

論神兵軍大總管功狀

右牒奉勅責聞大總管功狀者自契丹背恩營州失守
前軍喪律榆關不開幽平烏栖於重壘戎羯虎食於四
野燕南諸城十僅存一河朔之地人挾兩端由是豺狼
入於牢窰蜂蠆出於懷袖受服不宿孤劔先驅寇讐日
深甲兵未繼于時鳩合步騎不滿三千彼衆我寡兵法

文粹右下有被字同作通

文粹受上有王字

虜熾且保關守塞力猶不禦况土人弄兵轉相攻拔外
召夷狄內據險隘冀州既陷勢將不巳常決水之衝承
烈火之燭逆風撲燎摧岸塞河韓白見之知其難矣王
權以料敵靜而鎮下宣國恩以撫寧曉愚俗以逆順督
將吏以忠義示士伍以嚴肅深籌秘于六奇潛檄通于
千里滄瀛貝博響援增氣幽易恒定聲威自立而又分
兵井陘杜其西望引軍河漕阻此上流張虛旗于趙城
設奇兵于襄國亦猶夫吳人潛軍于巢縣而見舟豫章
漢將捷逕于武關而聲出嶠澠蓋廣援以安衆多方以

悞敵故能舉無遺策兵不踰時滌昂宿于妖氛拔冀方
于塗炭俾皇靈溥暢黔首昭蘇朝廷釋東顧之憂漳滏
息南侵之患然後歸剽掠返流亡業窮乏賑痍傷僵暴
皆掩死喪無怨賞不失勞亦無濫受罰不漏罪亦無冤
人則王有大勲于是役也而又誠以奉上義以利人至
忠之狀有三爲善之跡有五所謂忠者一曰思致命也
初戎寇方殷王乘駟救衆纔數騎捍敵羣醜山東父老
如恃山河旣而王躬擐甲胄吐誠師旅誓在盡敵以報
前讎故得感激來戰決命爭勝二曰能果斷也凶黨狂

狡飛轉妖書。吹堯謗舜。間誘愚惑。事斯蔓結。搖我人心。王陰察州間。揜求魁蠹。獲應賊書人。耿羅渚等一十三人。焚書伏罪。衆而後定。故得破謀殺諜。悖計無施。三曰誠感神也。王地維近。屬躬當大任。所過山川鬼神之地。罔不精意懇禱。以請云。天子聖明。皇天輔德。寔降靈助。以濟神兵。幽感明祇。多獲孚祐。故得行師之處。勝風送旗。合戰之時。興雲翊陣。金鼓所向。冰消草靡。所謂善者。一曰均下也。飲食勞逸。與將士必同。二曰潔已也。徧賞有功。王秋毫無受。三曰詢善也。國之彛典。成誦在心。閱

文粹資作語

文粹推作惟

寔定名。必資羣議。四曰嫉惡也。每戮一人。親數其罪。必深加咎責。使愧恥於地。五曰不伐也。賊平之日。將吏賀功。王稱美天威。推勞士衆。兢兢然若不已。有也。惟聖人神武制命。預授兵符。惟大總管忠善龔行。克成廟筭。今者顯號年紀。騰輝國籍。方謂垂範雲臺。勒休彝器。而杜遣宴甫。率于舊章。茅土增封。殊末于宗正。此壯夫義士。所以竊議而長歎者也。雖樹下不言。用歸功于明主。然策勲有典。何勸善于戎臣。敢憑下問。是用大陳其所。正復州縣。招撫歸降。補署官僚。存集流逆。擒殺凶醜。收

獲軍寔與吏士共功者俱如別狀

賀彩雲見狀

右伏奉恩旨今日屬下元賜臣等侍從升降聖闕禮謁大聖尊容行香之際日西南有彩雲見者伏以大道無形至誠斯應上元降福感而遂通步輦陟於齋宮虔修香火彩雲生于曉日遽發祥光是知聖德與天心合符萬靈與羣仙叶贊臣叨陪侍從如昇汗漫之遊承恩禮謁更觀氤氳之瑞榮幸之極千載一時無任欣慶之至

賀破吐蕃狀

右臣等伏以涼州遙稟神算大振天威吐蕃小醜應時摧敗元惡渠魁乘勢俘戮隻輪匹馬坐見無遺雖虞舜之格有苗黃軒之征涿鹿未有廓清氛祲如今日之盛者臣等無任慶快之至

謝賜撰鄭國夫人碑羅絹狀

右內侍尹鳳祥宣口勅得所進鬪羊表及鄭國夫人碑今賜卿綵羅二十四絹一千匹鬥羊薄技恩感戰士之心雕蟲陋詞媿稱賢母之德効輕賞重戴厚慚深臣子之情豈望天報

張鼎公集 卷二 六
集賢院謝示道經狀

右臣伏見聖札金字八分寫道經兩卷以爲惠文太子
三七追福天毫發彩宸翰騰輝色麗風雲光逾日月伏
惟陛下孝弟之至通于神明俯念天倫用資幽贊當茲
炎暑服此勤勞事絕古今感深名教臣忝司舊職載考
前王未有親親之至楷隸之美如此之備也足以作則
貽範垂之無窮伏望宣付史館以光典策無任誠懇慙
惶之至

謝賜御書大通禪師碑額狀

右內侍尹鳳祥宣示御書大通禪師碑額六字畫起平
雲點蹲芒玉戈矛攢倚鸞鶴交飛神功發于至想睿思
成于元德實謂天龍捧持虛空稱贊逝者如在薦福知
歸臣栖志禪門撰碑靈塔幸遇聖情崇道御書假貸刻
星辰于嘉石爛日月于封邱感極悲生恩深無答臣無
任望外殊澤之至

謝賜藥狀

右內史陳忠盛宣旨賜臣痢藥臣攝生無方自貽疾疢
聖慈矜憫垂恩救護氣衰力憊忽吞永命之符腸滑胃

張氏公集 卷之十一
虛更餌返魂之草蒙天營祐指日痊平雖萬粉灰何酬造化謹附忠盛奉狀陳謝以聞

對策

詞標文苑科策

第一道

臣聞舜命昌言漢徵極諫嘗覽千古賢哉二君今陛下發德音下明制選空岩穴訪匪與臺人哉邈乎過之遠矣臣以草莽之賤謬當車乘之招誠不足以庶幾王庭充塞大問伏讀聖旨乃知天心之所存焉臣聞昔者鳥

跡代繩龍文演卦水土遷王時更萬祀金木互興人非一姓暨乎三皇五帝氏往夏商周漢氏作或導人以禮樂或驅俗以政刑或革弊以忠敬或治風以文武非師古之誥有殊蓋隨時之義且異也伏惟聖母神皇陛下誕受鴻基光膺駿命粵若立極格天之業論道布政之典任賢克暴之功出洛卿雲之瑞此并藏緯玉冊勒休金版鬱美前古揚光後葉者矣至若創業垂統之則宏猷永圖之美重光三聖再清六合可不謂然乎猶或惕慮推溝勞謙馭朽謝文明于薄德想疇庸于清問此陛

下之至讓也愚臣何足以知之策曰適時之務何先經
國之圖何最臣聞古者因人以立法乘時以設教以義
制事以禮制心夫人者理得則氣和業安則心固崇讓
則不競知恥則遠刑若強人之所不能雖令不勸禁人
之所必犯雖罰且違故曰政不欲煩煩則數改數改無
定人懷苟免之心網不欲密密則深文深文多傷下有
非辜之懼竊見今之俗吏或匪正人以刻爲明以苛爲
察以剝下爲利以附上爲誠綜覈之司考課專于刀筆
撫字之宰職務具爲簿書陛下日昃雖勤守宰風化多

闕臣以爲將行美政必先擇人失政謂之虐人失人謂
之傷政捨人爲政雖勤何爲伏願陛下進經術之士退
掎克之臣崇簡易之化流愷悌之風畫一成歌此適時
之務也慎賢而用此經國之圖也苟能英才不棄大化
方隆而猶曰朝謝垂衣野非擊壤則文武之道尚何言
哉堯舜之君徒虛語耳策曰帝皇之道奚是王霸之理
奚非者布在方策臣聞之矣聖人御歷上淳而下信帝
者應期君明而臣哲周用王道教化一而人從漢雜霸
政刑政嚴而俗僞故親譽優于畏侮文章劣于成康臣

謹對

第二道

臣聞刑以助教德以閑邪先王慎于好生大易誠于緩死今陛下母臨黔首子育蒼生孚佑下人克配上帝然有東南小祲荆蠻遠郊雖聖德泣辜尙用防風之戮天心罪己仍勞淮甸之征具有誑閭閻脅從非邑陛下愍孤霜于海淮恤困窮于江漢捨從寬宥此陛下之恩也而蕞爾餘孽蠢茲頑兇思弄兵于潢池之下將構難于戎狄之域罪盈稔貫禍得萌芽此又陛下之明也今

陛下乃賜臣策曰豈止殺之方乖于折衷將小慈之澤爽彼大猷臣實見折衷大猷之規不知小乖微爽之義也策曰刑政之要寔所明閑臣聞政猶水火刑譬陰陽頃者三監亂常有司旣糾之以猛于今四罪咸服陛下宜濟之以寬明肆赦之渥恩安萬人之反側布深仁于羅鳥收至察于泉魚豈不大哉天下辛甚且夫人者眚也暗而不可罔庶者衆也愚而不可欺是故刑在必澄不在必慘政在必信不在必苛故明王之理天下也刑一則人畏而不干政簡則俗齊而不僞於是禍亂不作

災害不生君安于上臣悅于下百姓日用而不知其然
四海風動惟帝之則道暢鍾石聲流舞詠其行已也非
他所理者以此刑政之要庶幾一隅臣謹對

第三道

伏惟陛下則天法地畏命重人據河洛之規模總風雨
之交會軒后魚圖之水建邦設都周公龜墨之地考堂
作室靈祇降福嘉祥薦祉制同神造力以子來將以殷
薦上帝至法也嚴配先王至孝也加以八風攸序四時
克諧無得而稱能事畢矣猶復執勞謙之不已懼盛禮

之未宏訪未學之臣詢稽古之政斯事體大臣何足言
然而敢不欽承以竭涓滴耶策曰何代之政參詳適中
何禮之規施用爲切臣謹錯綜三五明徵典謨竊以緯
武經文布方策而非遠英風顯號流頌聲而可襲未有
反義悖德而致昇平之政棄禮違經克以永終之祿莫
不發號施令法乾坤之動靜執契縣衡順金木之刑政
是故青陽元室遵孟仲而觀風白輅朱旂因離光而布
政養老用上庠之禮教胄以大學之義環水著辟雍之
名向陽表明堂之位蓋所以享羣瑞朝諸侯頒正朔調

景緯成簡易之基崇久大之業也皇王奧旨庶此詳探
周漢前蹤難于專用臣才智駑劣草莽鯁生至如軍國
務廣政刑理急但至敬無文信言不美陛下欲聽其說
必觀于事將達其謀先求諸道危言抵禁破膽寒心伏
惟聖主稍留天聽臣謹對

批答

答宰臣賀破賊狀

省表具知蠢茲戎狄侵軼邊鄙不交鋒刃自取敗亡既
邊將之功亦天道所棄心之有慰與卿同之

